

Գեղարքունիքի մարզպետն ամփոփեց իր պաշտոնավարման 100 օրը

Սեպտեմբերի 7-ին Գեղարքունիքի մարզպետ Իշխան Սաղաթելյանի պաշտոնավարման 100 օրվա կապակցությամբ Գեղարքունիքի մարզպետարանում հրավիրվեց մամուլի ասուլիս, որին մասնակցեցին հանրապետական եւ մարզային զանգվածային լրատվության միջոցների ներկայացուցիչներ: Մարզպետ Իշխան Սաղաթելյանը ներկայացրեց իր պաշտոնավարման 100 օրվա ընթացքում մարզպետարանում եւ մարզի համայնքներում կատարված աշխատանքները, առաջիկա հրատապ անելիքները, արձանագրված հիմնախնդիրները եւ ձեռքբերումները:

«100 օրվա ընթացքում մենք ունեցել ենք աշխատանքային ծանրաբեռնված գրաֆիկ: Մեր առաջին քայլով նախ գույքագրել ենք մարզում տարիներով կուտակված բոլոր հիմնախնդիրները: Ունեցել ենք աշխատանքային 42 հանդիպում, համայնքային 35 այց, 7 անգամ կազմակերպել քաղաքացիների ընդունելություն՝ ընդունելով մոտ 350 քաղաքացու, ստացել 607 դիմում, որոնք բոլորն էլ հաշվառվել են, ուսումնասիրվել ու պատասխանվել օրենքով սահմանված կարգով», - ներկայացրեց մարզպետը:

Այնուհետ Իշխան Սաղաթելյանը խոսեց այն խնդիրների մասին, որոնք մարզի բոլոր համայնքների համար առանձնահատուկ են և կրկնվող:

«Գրեթե բոլոր տարածքներում ու համայնքներում մենք ունենք ճանապարհաշինական խնդիրներ, որոնց մի մասն առավել հրատապ ու կարելի է ասել՝ համարում: Առաջնահերթ ենք համարում Շորժա-Վարդենիս ռազմավարական նշանակության ճանապարհի Ծափաթաղ-Փամբակ 12 կլիոմետր երկարության հատվածի, Սեւան քաղաքի Գոմաձոր-Ցամաքաբերդ 5,8 կիլոմետր երկարության ճանապարհի, Արծվանիստ գյուղի համայնքային ճանապարհների հիմնանորոգումները: Նույնիսկ քաղաքային կամ առանձին խոշոր մոտ 20 գյուղական բնակավայրերում դեռեւս ասֆալտապատման կարիք ունեն շատ ճանապարհներ: Դպրոցաշինության ոլորտում եւս բազմաթիվ խնդիրներ ունենք կուտակված: Ունենք երեք տասնյակից ավելի դպրոցներ, որտեղ բացակայում են պատշաճ կրթություն կազմակերպելու համար շենքային ու այլ անհրաժեշտ պայմաններ: Հաջորդ ընդհանուր խնդիրների ցանկն ընդգրկում է ջրամատակարարման եւ ջրահեռացման համակարգերը, որոնք նորացման ու արդիականացման խիստ կարիք ունեն: Դրանք պահանջում են մեծածավալ ներդրումներ եւ որոշակի ժամանակ, նաեւ՝ հետեւողական աշխատանք, որպեսզի քայլ առ քայլ կարողանանք հասնել արմատական լուծումների: Հիմնախնդիրների չորրորդ խումբը վերաբերում է առանձին համայնքներում մանկապարտեզների կամ մշակույթի տների շենքային պայմանների բացակայությանը: Սրան ավելացրած՝ շատ համայնքներում էլ առկա են լոկալ խնդիրներ: Բնական է, որ միջոցների անբավարարության պատճառով մենք միանգամից չենք կարող բոլոր հարցերին լուծում տալ, սակայն կփորձենք փուլ առ

փուլ եղած միջոցներն արդյունավետորեն ուղղել գույքագրված հիմնախնդիրների արմատական լուծմանը», -ասաց Իշխան Սաղաթեյանը:

Այս Գեղարքունիքի մարզպետը կանգ առավ իր պաշտոնավարման 100 օրվա ընթացքում արձանագրված հաջողություններին ու ձեռքբերումներին: Ըստ մարզպետի ներկայացման՝ քաղաքաշինության բնագավառում 2018 թվականի գործունեության ծրագրով շարունակվել է դպրոցների, մշակույթի տների, մանկապարտեզների, բազմաբնակարան շենքերի, մարզական օբյեկտների հիմնանորոգման աշխատանքները: 2018 թվականի ընթացքում ՀՀ պետական բյուջեի միջոցներով նախատեսվել է հիմնանորոգել թվով 3 կրթական օբյեկտներ՝ 239.3 մլն դրամ գումարով, այդ թվում՝ շարունակել Սեւան քաղաքի թիվ 1 հիմնական, Զոլաքար համայնքի թիվ 2 միջնակարգ դպրոցների հիմնանորոգման աշխատանքները, սկսել Ներքին Գետաշեն համայնքի թիվ 1 միջնակարգ դպրոցի հիմնանորոգման եւ նոր մասնաշենքի կառուցման աշխատանքները, իսկ Սեւան քաղաքի մշակույթի տան հիմնանորոգման աշխատանքները շարունակվել է 157 մլն. դրամ գումարով: Ասիական զարգացման բանկի միջոցներով շարունակվելու է Գավառ քաղաքի թիվ 2 հիմնական դպրոցի նոր շենքի կառուցման աշխատանքները, որի նպատակով հատկացվել է 395 մլն. դրամ: Հայաստանի տարածքային զարգացման հիմնադրամի կողմից ավարտվելու է Վարդաձոր համայնքի մանկապարտեզի շինարարությունը եւ երեք մանկապարտեզների հիմնանորոգման աշխատանքները Սեւան, Գավառ քաղաքներում ու Լիճք գյուղում, որի համար հատկացվել է 240 մլն. դրամ: 2018 թվականին քաղաքաշինության բնագավառում կատարվելու է 1031,3 մլն. դրամ ներդրումներ, որի արդյունքում կստեղծվի 239 աշխատատեղ:

Այս տարվա ընթացքում զարգացման ծրագրերի ներդրման բնագավառում իրականացվել է սուբվենցիոն 26 ծրագիր, եւս 13-ը այս պահին գտնվում են ընթացքի մեջ: Ընդհանուր առմամբ ներդրվել է 1 միլիարդ 480 միլիոն դրամ՝ համայնքների համաֆինասավորմամբ: ՀՀ կառավարության կողմից իրականացվող հրատապ ծրագրերի շրջանակներում մարզի 13 համայնքներում կիրականացվի կենսական նշանակության 19 ծրագիր, որտեղ կներդրվի շուրջ 550 միլիոն դրամ: Այս ծրագրերի իրականացման արդյունքում հիմնանորոգվում են ճանապարհներ, խմելու եւ ոռոգման ջրամատակարարման համակարգեր, մանկապարտեզներ, դպրոցներ, մշակույթի տներ:

Սեպտեմբերի 1-ի դրությամբ մարզում կուտակվել է շուրջ 172000 տ. խոտ, 9000 տ ծղոտ: Արտադրվել է մոտ 7000 տ. բանջար, 2550 տ. պտուղ եւ հատապտուղ, մոտ 50 հազար տոննա հացահատիկ: Բարեհաջող ավարտվում է նաև ոռոգման շրջանը: Օգոստոսի 30-ի դրությամբ «Գեղարքունիք» ԶՕԸ-ի կողմից հողօգտագործողներին տրվել է 5267.5 մլն. խորանարդ մետր ջուր, որի հասույթը կազմում է 57 մլն. 942

հազար դրամ: Այսօրվա դրությամբ գանձումը կազմում է 19 մլն. 400 հազ. դրամ, որը շարունակվում է:

Կատարվել են անասնաբուժական պրոֆիլակտիկ բոլոր միջոցառումները: Մարզում առկա 41000 մեղվաընտանիքից ստացվել է 615 տոննա մեղր, 1 մեղվաընտանիքից՝ շուրջ 15 կգ: 2018 թվականի հուլիսի 1-ի դրությամբ լիզինգային կարգով մարզի ֆերմերային տնտեսությունները ձեռք են բերել 20 գյուղտեխնիկա, այդ թվում՝ 12 անիվավոր տրակտոր: «Համայնքների գյուղատնտեսական ռեսուրսների կառավարման եւ մրցունակության ծրագրի» շրջանակներում այս տարի նախատեսված է շինարարական աշխատանքներ 704 մլն. դրամի չափով, իսկ տեխնիկայի ձեռքբերման համար՝ 325 մլն. դրամ /95 միավոր/: Աշխատանքներն ընթացքի մեջ են:

Գեղարքունիքի մարզի համայնքների սեփական եկամուտների տարեկան պլանային թիվը կազմում է 1 մլրդ. 987 մլն. 5 հազ. 300 դրամ, որը նախորդ տարվա նկատմամբ ավել է պլանավորվել 517 մլն 194 հազ. 500 դրամով կամ 35,2 տոկոսով: 2018 թվականի սեպտեմբերի 1-ի կատարողական արդյունքներով պլանավորված 1 մլրդ. 324 մլն. 670 հազար 200 դրամի դիմաց փաստացի հավաքագրվել է 971 մլն. 645 հազար 700 դրամ: Փաստացի հավաքագրվածի աճը հուլիսի 1-ի հավաքագրվածի հետ համեմատած կազմում է 52,4 տոկոս, կամ բացարձակ թվերով 334 մլն. 136 հազար 800 դրամ:

2018 թվականին մարզի 11 համայնքներում հայտարարվել է համայնքային ծառայության 116 մրցույթներ, մրցույթների արդյունքում պաշտոնի են նշանակվել 87 համայնքային ծառայողներ: Մարզի 19 համայնքներում անցկացվել են 52 համայնքային ծառայողների ատեստավորումներ: Իրականացվել է համայնքի ղեկավարի եւ ավագանու գործունեության հրապարակայնության ապահովման վերահսկում: ՀՀ Գեղարքունիքի մարզում, համապետական շաբաթօրյակի շրջանակներում, ուսումնասիրվել եւ քարտեզագրվել է թվով 138 աղբավայրեր եւ աղբակույտեր, որից 29-ը ամրագրված է քաղաքաշինական ծրագրային փաստաթղթերով: Փակված աղբավայրերի թիվը մարզում կազմում է 109: Մարզում իրավաբանական անձանց հետ կնքվել է աղբահանության 1746 պայմանագիր:

2018 թվականի օգոստոսի 1-ից մարզի առողջության առաջնային պահպանման օղակի աշխատակիցների աշխատավարձը բարձրացվել է շուրջ 15 տոկոսով: Շուտով նորագույն տեխնոլոգիաներով հագեցած Սեւանի Բժշկական կենտրոնում կտեղադրվի համակարգչային տոմոգրաֆ, որը կսպասարկի ողջ մարզի ազգաբնակչությանը: Սկսվել է Մարտունի բժշկական կենտրոնի արդիականացման ծրագիրը: Մարզի ազգաբնակչության շուրջ 37.702-ը կենսաթոշակառուներ են, որից 15720-ը՝ հաշմանդամներ: Մարզում զինվորական կենսաթոշակ են ստանում 317

հաշմանդամ: 2018թվականի օգոստոսի 1-ի դրությամբ մարզում ընտանեկան նպաստ են ստացել 11.078 /միջին ամսեկան/ ընտանիք, իսկ հրատապ դրամական օգնություն՝ 740 ընտանիք:

Իշխան Սաղաթելյանը կանգ առավ նաեւ կրթության ոլորտում առկա հիմնախնդիրներին: «Մենք մեկ տասնյակից ավել դպրոցներ ունենք, որտեղ մանկավարժների թիվը գերազանցում է աշակերտների թվին: Խոսքը վերաբերում է հիմնականում սահմանամերձ, բարձրլեռնային ու հեռավոր բնակավայրերի դպրոցներին, որտեղ առկա է նաեւ մանկավարժական մեծ քանակի թափուր հաստիքներ, ինչպես նաեւ՝ երկկոմպլեկտ կամ եռակոմպլեկտ դասարանների պահպանում: Այս բոլոր խնդիրներն էապես ազդում են կրթության որակի վրա, ինչը մեզ չի կարող չանհանգստացնել: Առհասարակ, մենք դպրոցներում նոր ուսումնական տարում ունենք մանկավարժական շատ թափուր տեղեր, որոնք դժվար են լրացվում մասնագետ կադրերի պակասի պատճառով: Եթե հումանիտար առարկաների գծով մասնագետները չափից դուրս շատ են, ապա նույնը չի կարելի ասել բնագիտական առարկաների մասին: Նույնիսկ ֆիզկուլտուրայի ուսուցչի խիստ կարիք է զգացվում շատ դպրոցներում: Ես կոչ եմ անում մանկավարժներին՝ բարձր դասարանների աշակերտներին ճիշտ մասնագիտական կողմնորոշում տալ հենց այս պահից, որպեսզի նրանք բուհն ավարտելուց հետո կարողանան նաեւ իրենց համար աշխատանքի խնդիր լուծել: Ինչ վերաբերում է դպրոցաշինությանը, ապա պետք է ասեմ, որ առաջիկա 2-3 տարիների ընթացքում մենք ծրագրում ենք անհուսալի վիճակում գտնվող դպրոցական շենքերը նորոգել ու համապատասխանեցնել արդի չափորոշիչներին: Շուտով հանրությունը կտեսնի այդ արդյունքները», - հավաստեց Գեղարքունիքի մարզպետը:

Իշխան Սաղաթելյանն անդրադարձավ նաեւ մարզպետարանի ենթակայությամբ գործող սոցիալական աջակցության տարածքային գործակալություններում կատարված ուսումնասիրությունների արդյունքներին: «Այս կառույցներում մեր ուսումնասիրությունների արդյունքում բացահայտվել են բազմաթիվ թերացումներ ու խախտումներ, որոնց համար աշխատանքից ազատվել են որոշ աշխատակիցներ, որոշ տեղերում էլ ուսումնասիրությունները շարունակվում են: Անելու ենք հնարավորը, որ այս ոլորտում աշխատանքները կատարվեն բացառապես օրենքի տառին ու ոգուն համապատասխան: Գտնում եմ, որ այս համակարգը արմատական բարեփոխումների կարիք ունի, որպեսզի բացառվեն չարաշահումները կամ խախտումները», - շեշտեց մարզի ղեկավարը:

Ապա Իշխան Սաղաթելյանը պատասխանեց լրագրողների բազմաթիվ հարցերին:

Պատասխանելով մարզում գյուղատնտեսության ապահովագրական համակարգ ստեղծելու մասին հարցին՝ մարզպետը նշեց, որ այժմ Հայաստանի մի քանի մարզերում այս ուղղությամբ իրականացվում են փորձնական ծրագրեր, որոնց

հաջող ընթացքի եւ ավարտի դեպքում Գեղարքունիքի մարզը եւս կստեղծի գյուղատնտեսության ապահովագրական համակարգ: Պատասխանելով Գեղարքունիքում խոշորացված համայնքներում առկա արդյունքների ու աշխատանքների ընդհանուր վիճակի մասին հարցին՝ մարզպետը շեշտեց, որ շատ դեպքերում համայնքները խոշորացնելիս հաշվի չեն առել բնակիչների եւ տեղական իշխանությունների կարծիքները, այլ կարելու առանձնահատկություններ: «Համայնքների խոշորացումը շատ լավ գաղափար է, մանավանդ որ մեր մարզի շատ փոքր համայնքներ ֆոնդային բյուջեներում գումար չունենալու պատճառով չեն կարողանում մասնակցել սուբվենցիոն ծրագրերին, իսկ միավորման դեպքում այդ խնդիրն ինքնըստինքյան կլուծվի, սակայն խոշորացումը պետք է հիմնավորված լինի բնակչության կողմից, արդարացված լինի բազմաթիվ կողմերով», - կարծիք հայտնեց մարզպետը:

Իշխան Սաղաթելյանը պատասխանեց նաեւ Սեւան քաղաքի կոյուղու կոլեկտորի եւ մաքրման կայանի, քաղաքային ու գյուղական այլ բնակավայրերի ջրահեռացման համակարգերի, աղբի վերամշակման գործարանի կառուցման, ձմեռային տուրիզմին բնորոշ ենթակառուցվածքների ստեղծման, վերականգնող էներգետիկայի արմատավորման եւ զարգացման, գյուղմթերքների իրացման եւ մի շարք այլ կարելու հարցերի, հավաստիացնելով, որ իր պաշտոնավարման 100 օրը հաստատուն հիմք է ստեղծել կենսական կարելու ծրագրերի հետագա ներդրման եւ իրականացման համար:

Գեղարքունիքի մարզպետարանի լրատվության բաժին

